

Waraga ya Bölis ma co Kürünsüs ya Eera ya Tafa'da tumma

Bölis arigiri waraga ya unngu co kadu ma kaniisa ka Kürünsüs anya ma Yünan ma dhabbu mo, kini ka tunggeene ka fiini ma tara co tassa kene. I'i agadünnü tumma ma İnjüli co eene a kadu tamma ka Yasu kadhabbu. I'i aguu'bu eege ka nanggeedi iini ka ticci kene kanna nja iini ka arigiri ada nawaraga co eene lakiini kaleefe tatoroko eene ku'bu. İkirı ka tarigiri waraga ya ma takinyi tagi'di tanno eene ku'bu a'da üfürü tala eege ka oona.

Afeene afa kadu ma kaniisa ka Kürünsüs kafünü eema a Bölis ka oona a'da i'i atamü gürüüsi ya kadu ka kürünügi iini ma co tunggu co kadu ma kaniisa na eema ka titaalo kene no, a'da taalo tafiini. Ka waraga tiya, i'i arigiri tumma ma eyi tiya iini dhabbu nja linggo ma teema tumma ma İnjüli ma Yasu ya Masala ka tagümmünü i'i iini ya. I'i afe'de agalaana kadu ma kaniisa a tumma ma tafa ka gürüüsi tiya eene ta'diila amang kene tamana a kadu tanno Masala nja linggo ma kaniisa ka na'buugu tökönö (2 Kürünsüs 9.10).

¹ A'a na Bölis tafiini ya Yasu Almasihi a tasaasa tanno Masala, a'a nja örre ma angnga Timosaws ungngo tunggu waraga ya co kaniisa

tanno Masala ka Kürünsüs nja kadu ma kaniisa nye'd'de ka Akaiya.

² A Masala ma Pupa tiya aja nja Uugaara tiya aja Yasu Almasihi tanangnga türü aaga nja ta'diila.

Bölis amana ta'diila a Masala

³ Kada nangnga ta'diila a Masala Pupa tiya Uugaara yaaja Yasu Almasihi, Pupa ya ana 'bangnga ya, nja Masala ma alüülü angnga ka iye.

⁴ I'i alüülü angnga ka iye ka dhügürü tiya aja ya in'dili amang kaja tambaanya talüülü kadu na dhügürü no ka iye a talüülü tanno iidi ka'duga ka Masala ka eyi tiya iidi no.

⁵ Afa maaja kagosso ka dhügürü ma Almasihi, angnga afe'de kagosso ka talüülü iye.

⁶ Üürü unngo kadhügürü unngo kalüülü aaga ka iye nja toolona kidi kara talüülü iye, talüülü iye naada eege kamiini ya anangnga aaga ka tidhi oona ku'bu a tümünü eedi ku'bu ma dhügürü tiya ungodho ya iidi kadhügürü ya.

⁷ Tindhigi iidi kada kütü ka ööye miini ka takardha ku'bu ma tindhigi Masala, kudumma iidi ka tussu afe'de aaga toso ka dhügürü tanno iidi, afe'de kosso aaga ka ta'baga nanggeedi tanno aja.

⁸ Nagöre niidi taalo unngo kasaasa aaga katüürü ma tatoroko tanno agalinggo adene ana unngo ka Asiya no, eema ya agalinggo adene ana unngo ya adhabbu indhi unngo taalo ka kambaanya unngo taalo kamma a'da ara unngo tefe ka 'di.

⁹ Kiki ungnö kide dhorro kidi ka nanggeedi a'da kagümmü adene ma inde, tumma kagüüni adene amang kidi tafa türrü ka nanggeyi tanno iidi ka oona, lakiini ka Masala tammo iji kadu na ake no.

¹⁰ Oogo moolona ungnö ka tatoroko ma inde afa ma tanno, oogo mara toolona. Kümme angnga nanggeyi niidi oono ma tindhigi oogo kono ka tütü ka katoolona ungnö.

¹¹ Afa maada ka takinyi ungnö a tafara ka Masala tanno ada. A'da kadu kadhabbu kamana ta'diila a Masala ka üüdü ma ungnö, a Masala mara tanangnga baraka ya a'diila ya ungnö kono ka tamma kafara tanno kadu kadhabbu.

Bölis agere tumma niini

¹² A 'bitingngö kabbü ungnö 'daniisö ma nanggeedi tanno niidi, yungngö iki ungnö a'da taneene niidi ka 'büdhülü nja taneene tanno iidi nja aaga no, ka tiicolo türü na Masala eege kamiini taalo a ta'dara ma tamö'di, lakiini a türü tanno Masala.

¹³ Taalo ungnö karigiri ada tumma no co aaga no ada kara tüiröönö aaga tussu no, a'a nasaasa aaga a'da aaga tussu nye'd'de.

¹⁴ Afa maada ka tussu ungnö ara aaga saga tussu ungnö nye'd'de aaga tabbü 'daniisö ana ungnö afa mungngö kara tabbü 'daniisö ana aaga ka uuru tanno Uugaara Yasu.

¹⁵ Nakussu a'a tumma no nye'd'de kede ka tasaasa tö'dö kada kannu ka dhidha amang ka türü tagusunja aaga teera.

¹⁶ Kede kara co Makadoniya, ara a'a tadho kada kannu, a kede kara tafada ka Makadoniya

ya, ara a'a tö'dö kada amang kada tattogo a'a ma co a Yahüüdiya.

17 Kede ka tasaasa tumma 'dee, nakiisini ömö'di alla nagalinggo a'a kada midhi, ara a'a tiki a'da ii ii nja kaw kaw ta unggodho kafeene co?

18 Masala mussu a'da tumma niidi nja aaga no, taalo kiki ii nja kaw,

19 Kudumma i'i ya 'Bii'bala ma Masala yiidi kadeema tumma miini nja aaga, unnggo nja Salwans nja Timosaws, taalo kiki ii, alla kaw, lakiini kini taalo kaw illi ii ya miini.

20 Ii ya miini ka tumma tanno in'dili, nggeege yunggo iidi ka tiki a'da "Amiin" ana Yasu Almasihi a tindhigi ko'do ma tidhindi ma Masala.

21 Masala oogo mungngo manangnga angnga ka takardha ku'bu ana eere ma Almasihi oogo mungngo ma'bunaana angnga.

22 Oogo mabbünnü hitimi yoono kaja ka oona, manangnga Koronggore yoono kaja ka nanggeedi.

23 A Masala tussu a'da nanu a'a ka öö'dö ka Kürünsüs, a 'bangnga ma aaga kagu a'a.

24 Taalo unnggo kasaasa ta'bunu aaga ka tamma ka Masala, lakiini unnggo ka linggo nja aaga amang kada ta dhodho kudumma maada katütü ka tamma ka Masala dhorro.

2

1 I'i yungngo eede ka tiki a'da nafa tö'dö kada kannu iidi a'a tanangnga aaga ka tümmü nanggeedi a'a a tagoroo'bo.

² Kudumma eede kara tanangnga aaga ka tümümü nanggeedi 'dee, a mada i'i yungngo ara tanangnga a'a ka tadhodho afa taalo kadu neede ka anangnga eege ka tümümü nanggeedi ka koroo'bo no?

³ A'a narigiri waraga ya kudumma tanno kede kara tö'dö kada nafa tanangnga kadu na amana a'a ka tadhodho tafa tanangnga a'a ka koroo'bo. Nussu tumma aaga nye'd'de dhorro a'da ara aaga toso ka dhodho nja a'a aaga in'dili.

⁴ Narigiri ada a'a waraga ya co aaga ana eedi ka ticine a tatoroko nja tadinigöögö ma eedi a fara tasuuru kede ka iyye, tumma neede no 'do ya a'a taalo nasaasa tanangnga aaga ka koroo'bo, lakiini a'a nagala ka asaasa a'da aaga tussu a'da nasaasa a'a aaga dhorro.

Taadha ka tatoroko tanno kadu

⁵ Lakiini ömö'di ya ö'dö a tagoroo'bo ya, taalo anangnga a'a ka koroo'bo ungodho a'a, lakiini anangnga aaga ka koroo'bo nye'd'de kungngo, lakiini taalo tagoroo'bo in'dili, i'di tumma tadhobu ka indhi kini.

⁶ Anda'dimo ka takapusu adene tanno ömö'di tiya ada kada kalinggo ana i'i aaga in'dili kungngo.

⁷ A 'bitingngö a'diila ada kara tafünügü i'i ko'do aaga tafa kini i'di tagoroo'bo dhindho.

⁸ Ara a'a tiki aaga a'da aaga takogoona ma tasaasa i'i dhindho.

⁹ A'a narigiri ada aaga tumma no co aaga amang kede tussu a'da kaföönyö aaga tumma neede nye'd'de.

10 Kada kara ta'diila nja ömö'di ka tatoroko tanno iini ya, na a'a taadha ka ömö'di ka tatoroko tanno iini, ara a'a taadha kini kide kidha ma Almasiihi kudumma aaga.

11 Kudumma Ebliisi kara tanggaaga tii'bi angnga, taalo angnga küürü ma tumma niini.

Kadu ma linggo ma timi'di tumma ma 'bitingngö

12 Kede ka öö'dö ka Tarwas ma teema tumma ma sorne tanno Almasiihi a fiini ma linggo ma Uugaara tafa'da nja a'a.

13 Lakiini a'a naga tinigöögö kudumma eede taalo naduna örre ma a'a ya Tito ya kanna, kikiiri ka tattogo a'a nunggeene naco Makadoniya.

14 Tanangnga ta'diila a Masala tammo unggeene ana angnga ka fiini ma tii'baana 'bucca ana Almasiihi. Masanna kondho ma tussu Almasiihi ka na'buugu in'dili.

15 Kadu na efe ka 'di no taalo kara tefe ka 'di ma nanggeyi tanno eene, lakiini ma ömö'di tiya eyi ka üüdü meene afiki'dö afe'de.

16 Kondho mo ka kadu tanno aama no ma feene nja kondho ma inde a kadu na oolonadene no tunya ma tefe ka 'di ma tamana kadu keefe ka 'di. Mada i'i yungngo ara tambaanya eema ya?

17 Taalo ungnngo kanadene a tumma ma Masala dhabbu afa kadu öccö, lakiini keema ungnngo tumma ma Almasiihi dhorro kidha ma Masala kada kadu tanno oono.

3

¹ Kafada ungnge angnga tafünügü nanggeyi naaja ko'do afe'de? Alla kasaasa ungnge waraga afa kadu könö ma talaana ndama aaga alla co aaga?

² Aaga ka waraga tiya iidü ya ikirinja kidü ka nanggeedi ussudene a kadu nye'd'de tüüröönö.

³ Kussudene aaga ka waraga tiya Almasihi, ö'dö ndama linggo nüüdi taalo arigiridene ana ünggölü, lakiini a Koronggore tiya Masala ma adinö mo, taalo ikirinja ka maraayo ma misü, lakiini ka maraayo ma nanggeedi ma tadü'd'dü.

⁴ Kamma ungnge ana eedi dhorro ana Almasi-
ihi ka Masala kidha.

⁵ Taalo ungnge kiki a'da ungnge küünü eema a tussu tanno iidü, lakiini türü nüüdi ndama Masala.

⁶ Oogo mungnge manangnga ungnge ka tam-
baanya linggo ma timi'di tumma ma 'bitingngö,
ya taalo ma tarigiri ma seriye, lakiini ma Korong-
gore, seriye ya arigiridene ö'dö ana inde, lakiini
Koronggore ö'dö a tefe ka 'di.

Tidhindhü ma timi'di tumma ma 'bitingngö

⁷ Üürü linggo ma inde ko'dodene a kireere'be
ka nüügisi kö'dö a tidhindhü amang ka laala ya
Istayil taalo kambaanya tadinö dhugudha ya
Müsa kudumma tidhindhü ma dhugudha tiya
iini ya ara saga titaalo ya.

⁸ Taalo linggo ma Koronggore kara kakogoona
ma tidhindhü?

⁹ Üürü linggo ma tasigi kadu ka tidhindhü ya,
ara tii'baana dhorro a linggo ma tidhindhü tanno
ara tö'dö a toolona.

¹⁰ Niiimö ya akadhindhî ya taalo tidhindhî kini 'bitingngö a'dugadene kudumma tidhindhî ka tagii'bi i'i 'bitingngö no.

¹¹ Üürü niiimö ara titaalo ya öö'dö a tidhindhî ara tidhindhî na tiya ara tö'dö a tefe ka 'di ta'billi ya tafaanya.

¹² Kudumma aja ka tindhigi no ya, kalinggo unngo 'biiñi kungngo.

¹³ Taalo unngo kafeene nja Müüsa ya kaküdhü ten'di iini ka iyye, amang ka laala ma Israyil tafa tiji töyeene ma titaalo ma tidhindhî tanno eene.

¹⁴ Nanggüüdü neene ka tangga'da ta'bitingngö, nanggüüdü neene katünküdhü a ten'di tiya miini ya, kene ka tiiri sorne ma timi'di tumma ma 'billi, ara ten'di tatandhaka ka ömö'di kara tuurna Almasihi keere.

¹⁵ Lakiini ta'bitingngö aleefe ten'di kene ka nangeedi ka tiiröönö ma seriye ya Müüsa.

¹⁶ Ka ömö'di kara tapadaga ka Uugaara ara ten'di ma taküdhü iyye tatandhaka.

¹⁷ 'Bitingngö Uugaara i'i ya Koronggore, a 'buugu ya Koronggore ya Uugaara ka tanna kide ya, ara tahürra tanna kide.

¹⁸ Angnga in'dili kungngo kiji angnga tidhindhî ma Uugaara ana iyye ka tatandhaka afa almandara angnga takatem'bele kada Koronggore tiya miini ya, ka tidhindhî na ö'dö ndama Uugaara, i'i ya Koronggore.

4

Eema ka nadhafala

¹ I'i yungngo a Masala ka anangnga 'bangnga unnggo ka linggo tanno, taalo unnggo kara tari'ba.

² Kaadha unnggo ka eema tiya ka raaya ya, taalo kaneene ana ünggü ka nanggeedi, unnggo taalo küsini kadu a tumma ma Masala. Lakiini kala unnggo tumma ma timin'da unnggo takindhigi oona niidi ko'do a tumma miini co ka kadu ka nanggeedi kidha ma Masala.

³ Üürü tumma ma İnjili niidi ka tadünnü no ka küdhü, eege ka tünggüdhü a kadu tanno aama no.

⁴ Eege taalo kamma, kudumma masala ma 'büdhülü tiya a'binyni eege ka iye amang kene tafa tiji töyeene na öyeene ada kene no, töyeene ma tumma ma İnjili ma tidhindhä na Almasihi, ya koronggore ma Masala ya.

⁵ Taalo unnggo keema tumma ma eyi tiya iidi, lakiini a tumma ma Yasu Almasihi ya Ugaara ya, kalinggo ada aaga kada kasaga ka üüdü ma Yasu.

⁶ Kudumma Masala ka tiki a'da, "Fa ka töyeene ka ö'dö kürö ndama ndüüli mo," oogo mungngo manangnga töyeene noono kidi ka nanggeedi, amang ka töyeene ma tussu eema ma tidhindhä na Masala ka dhugudha tiya Yasu Almasihi.

⁷ Ungngo ka nadhafala ma tam'bala ma tümümü eema ya, amang kini tussu adene in'dili a'da türü na Masala eege kamiini taalo niidi.

⁸ Tatoroko ka dhigi unnggo ku'bu ka na'buugu in'dili, lakiini taalo ka'dinggö, unnggo tadhere lakiini taalo unnggo kagi'di.

⁹ A kadu talinggo ungnogo, illi Masala taalo maadha kidi, ungnogo ta'dinggeene illi ungnogo taalo ka taaya.

¹⁰ Ungnogo 'bucca kümmü dhügürü ma inde tanno Yasu amang ka tefe ka 'di tanno iini tanna kidi ka oona.

¹¹ Ungnogo na efe ka 'di no ara ungnogo takeke 'bucca ka üüdü ma Yasu amang ka tefe ka 'di tanno iini tijidene ka tuu'da tanno iidü kara titaalo no.

¹² Nggeege inde kalinggo kidi ka oona, lakiini tefe ka 'di kunggo ada.

¹³ Sorne iki, "Nageema a'a kudumma eede ka tamma." A koronggore ma tamma tiya kidi ya, angnga tageema kudumma aja ka tagamma.

¹⁴ Kussu ungnogo a'da Masala mafiki'dö Uugaara Yasu ka inde ya, ara tanangnga angnga ka fiki'dö ka inde afe'de ana Yasu, öö'dö ana aaga nja ungnogo kono kidha.

¹⁵ Eema ya nye'd'de kudumma aaga, Masala mamana eema angnga dhabbu, a kadu no amana ta'diila a Masala nja tidhindhi tanno adhabbu no.

Tefe ka 'di a tamma ka Masala

¹⁶ Nggeege taalo angnga kara kari'ba, salla a tuu'da naaja saga titaalo, illi ömö'di ya ka tuu'da ka teene ya, ara tindinaana oona a naganuuru.

¹⁷ Kudumma 'bandhügürü tiya idhilli ya ya ara titaalo ya yaaja ka dhügürü ya indinaana tidhindhi angnga ta'billi.

18 Kudumma aja taalo kanaana iyye ka eema tiya aja kijöögö ya, illi eema yaaja ka titaalo kijöögö ya, eema yaaja kijöögö 'bitingngö ara titaalo, illi eema yaaja ka titaalo kijöögö ya, i'i yungngo ara tütü ta'billi.

5

Tefe ka 'di naaja ka 'dotombo'do

¹ Kussu angnga a'da fangga ma 'büdhlülü maaja ka taganna kide mo mara türürüdü, nöö'di naaja kungngo ka 'dotombo'do ta'billi a Masala ka tarü'bünü angnga taalo ka arü'bü adene ana iisine ma nakömö'di.

² Angnga 'bitingngö ka tadinigöögö angnga ma tasaasa 'di ya 'dotombo'do ka kürninja kaja ka oona.

³ A kaja kara tagirni i'i kaja ka oona ya, taalo angnga kara taganeene ana oona ku'bu.

⁴ A 'bitingngö kaganna angnga ka fangga ma 'büdhlülü, angnga tagüüni muuyu ana eema ka tindhi kaja taalo a'da angnga kasaasa takirnö ku'bu, lakiini angnga tagirni kide ko'do amang ka tefe ka 'di ta'duuru niimö ya ara titaalo ya.

⁵ Lakiini Masala oogo mungngo makindinaana fiini ya kaja ku'bu manangnga tümümü ku'bu ma Koronggore angnga amang kaja tussu iini.

⁶ Lakiini ta'bitingngö kütü angnga ka tamma dhorro, kussu angnga tumma aja ka tanna ka tuu'da tanno ka ku'b'ba ka Uugaara ku'bu no.

⁷ Angnga keefe ka 'di a tamma ma Masala taalo a niimö tiya aja ka tinö kide ya.

⁸ Kidhi angnga oona ku'bu angnga tasaasa tö'dö kürö ndama tuu'da tanno ara angnga ka taneene nja Uugaara.

⁹ Salla angnga saga taneene aja ka tanna ku'b'ba, angnga kasaasa Uugaara ka tamma kaja.

¹⁰ Kudumma aja in'dili kungngo ara angnga ka'dingnge kidha ma tahükümü ya Almasihi, amang ka ömö'di taluna niimö yiini ka tagalinggo a'da akaleefe ka tuu'da, üürü ka'diila üürü ka toroko.

Linggo nja ta'diila nja Masala

¹¹ Kussu ungnö tikiri ka tussu ri'ba ma Uugaara, ungnö teema nja kadu a'da Masala mussu ungnö dhorro a'a nasaasa a'da aaga tussu ungnö ana eedi tiya ada afe'de.

¹² Taalo ungnö kafünügü nanggeyi niidi ko'do kada kidha afe'de, lakiini kasaasa ungnö tafa'da fiini aaga, amang kada tafünügü ungnö ko'do, amang kada taluna niimö yaada ka asaasa tüüni iini a kadu tanno alaala oona a kadu ndama kürö ün'dügünggö a'da taalo ndama eedi ka teene.

¹³ Üürü ungnö kanagaaga ya, kanagaaga ungnö a Masala. Üürü ungnö ka'dara ya ungnö ka'dara kudumma aaga.

¹⁴ Kudumma aja kada kasaga ma tasaasa tanno Almasihi a'bunu ungnö kide, kaja ka ndagussu a'da ömö'di ungnö eyi ka üüdü ma kadu nye'd'de, kadu nye'd'de kaaya nja iini.

¹⁵ I'i eyi ka üüdü meene nye'd'de kungngo, kadu na efe ka 'di no taalo kara tefe ka 'di ma nanggeyi tanno eene. Lakiini ma ömö'di tiya eyi afiki'dö afe'de ka üüdü meene ya.

¹⁶ Ndama uuru tanno taalo ungngo kussu ömö'di ka tatuu'da, kakussu ungngo Almasiihi ka tuu'da, illi 'bitingngö taalo ungngo kussu i'i nggeege afe'de.

¹⁷ Üürü ka ömö'di kara taneene nja Almasiihi ya, ara tamö'di tiya insili ya, eema ya illi ya anda taalo, eema nye'd'de anda issi.

¹⁸ Eema ya nye'd'de ö'dö ndama Masala muuraana angnga ka oona nja Almasiihi mo, manangnga linggo ungngo ma tuuraana a kadu ka oona.

¹⁹ Masala muuraana kadu ka oona nye'd'de nja Almasiihi a ta'diila ma eyi tiya oono, taalo ümmü eege ka tatoroko tanno eene, manangnga ungngo ka teema tumma ma tuuraana ka oona.

²⁰ Angnga kungngo keema tumma ma Almasiihi, afa Masala oogo mungngo ma eema ana onngo'do tanno aja, yungngo iidä kadeema nja aaga ana eere ma Almasiihi a'da aaga ta töönjülü, aaga tümme ajeene nja Masala.

²¹ Masala manangnga ömö'di ya taalo üünä tatoroko ka tatoroko ka üüdü ma angnga amang kaja ta'diila kidha ma Masala ana i'i.

6

¹ Ka linggo tanno iidä nja Masala no, kasaasa ungngo aaga na amma ka türü tanno Masala no, aaga tafa tümöönö kada eema ün'dügünggö.

² Oogo makiki,

“Ka uuru meede ka tamma ya, naföönyö a'a tumma nüüdü,

a ka uuru ma Masala ka tamma, uuru ma toolona
naga kinyi a'a o'o ko'do.”

Ara a'a tadirina tumma o'o 'bitingngö uuru ma
toolona eege kungngo.

Dhügürü ya Bölis

³ Ungngo taalo kasaasa takara ka ömö'di kidha
ii'di tumma tagu ungnö.

⁴ Linggo nñidi ka talinggo no kasaasa ungnö
a'da kussu adene a'da linggo na Masala eege
kamiini, a tidhi oona ku'bu ka dhügürü miini,
ka talinggo adene nja dhügürü.

⁵ Tabbü adene nja tapusu adene nja taga'da
'buugu adhügürü tadinigöögö a taneene ana
iire.

⁶ Ka tinsili ma eedi nja tussu eema nja tidhi
oona ku'bu, nja 'bangnga nja muuyu ka Korong-
gore tiya Insili ya, nja tasaasa ajeene dhorro.

⁷ A tumma ma timin'da nja türü tanno Masala
nja eema ma koro'bo tiya a'diila ya ka nñisö ma
kuri nja nñisö ma küüle.

⁸ Ka tidhindhü nja midhi, kümmü ungnö
kada oroko kümmü ungnö ka'diila ungnö ka-
timin'da, lakiini kümmü ungnö kada korokoro.

⁹ Taalo kussu adene ungnö lakiini kümmü
ungnö a'da kussu adene, ungnö taaya lakiini
kefe ungnö ka 'di, ungnö tabbü adene lakiini
taalo kagirinadene.

¹⁰ Kamüürü ungnö lakiini ungnö ka dhodho
turi kungngo, taalo eema kide illi kadu ka tüüsü
kadhabbu, afeene afa taalo eema kide illi ungnö
kana eema in'dilü.

¹¹ Ka kadu ma Kurnusus ka keema ungnö tumma ma timin'da nja aaga, ungnö tafa'da nanggeedi niidi aaga nye'd'de,

¹² taalo ungnö kümme nanggeedi ma aaga, lakiini aaga kungngö kümme nanggeedi ma ungnö adha.

¹³ Nggeege a'a neema a'a nja aaga 'bitingngö afa maada kada laala tiya eede kungngö, aaga üüni ana ungnö afa miidi ka tüüni ana aaga, aaga fada nanggeedi naada ungnö ka sigiiri.

Aaga fa toso nja kadu tanno kitaalo kamma ka Masala no

¹⁴ Aaga fa toso ka dholle tanno ungnö no nja kadu tanno taalo kamma ka Masala no. Minna yungngö ara tuuraana ta'diila ka oona nja tatoroko? A minna i'i yungngö ara tuuraana töyene ka oona nja ndüüli?

¹⁵ Taalo niimö ma tuuraana Almasihi ka oona nja Ebliisi? A minna i'i yungngö ara tuuraana ömö'di ya amma ka Masala ya ka oona nja tiya taalo amma ya?

¹⁶ Taalo la ma Masala ara tullu ana koono nja la ma namasala ma 'büdhülü? Angnga ka nöö'di ma Masala tammo efe ka 'di mo, afa ma Masala ka tiki, "Ara a'a taneene nja eene nunggeene nja eene kene ka söödö na a'a ta Masala tammo eene kada kadu tanno eede."

¹⁷ I'i yungngö a Masala ka tiki,

"Aaga aadha eene ka oona,

aaga tafa taneene nja eene.

Aaga fa tümme eema ya nyoro ya ka oona,

amang kede tamma kada.”

18 Masala mana türü mo miki, “Ara a'a ta Pupa tiya ada aaga ta laala tiya eede.”

7

1 Üürü timi'di tamma no nye'd'de kungngo, Masala manangnga angnga nagöre eede, kada kagala tuu'da naaja kinsili ka tatoroko ma tuu'da nja koronggore, angnga taganeene ka tinsili ma ri'ba ma Masala.

Bölis adhodho

2 Aaga amma kidi a nanggeedi, taalo unngo küüni ada ömö'di ku'bu, nja talinggo eema ya toroko ya nja tallogo ma eema tiya ömö'di töccö.

3 Taalo a'a nadiri tamma no ma tasigi aaga, nilli a'a ka tiraana kadhadha a'da aaga kungngo iidü ka nanggeedi a'da angnga taganeene ka'dügüllü angnga takaaya ka'dügüllü.

4 Namma a'a kudumma aaga dhorro nabbü 'danüisö ana aaga nafünügünja ko'do nja dhügürü tiya iidü ya, eedi yeede adigine a ta'diila dhorro a dhodho.

5 Taalo tuu'da nüidi ka kagünü 'do jiddi müidi köö'dö ka Makadoniya, ka'dinggö unngo ka ta'digineene nja diidi kürö nja ri'ba ka teene.

6 Lakiini Masala mamana tiicolo aja ka nanggeedi muu'bu unngo ka eedi ka tö'dö tanno Tito.

7 Taalo ka tö'dö tanno iini unngodho eege, lakiini ka ta'diila tanno iini ka tuna kada no,

ka'diila oona eede kini ka tirina tumma ma aaga ungnö, ka tasaasa tanno ada nja fara tiya ada nja tagu'daana ka eedi tanno ada kudumma a'a, amang kede tadhodho dhorro.

⁸ Üürü a'a nangnga aaga ka koroo'bo a waraga tiya eede ya, taalo a'a nara teema kada kussu a'da aaga kada kussu a'a adha, nussu a'a a'da waraga ya anangnga aaga ka koroo'bo lakiini ara tagünü idhilli.

⁹ Nadhodho a'a 'bitingngö taalo kudumma eede kafa kada aaga tagoroo'bo, kudumma ada kagoroo'bo a fiini ma tussu kide afa ma Masala ka asaasa ungnö taalo kilä aaga ka oona.

¹⁰ Kudumma tagoroo'bo ma tussu kide ana Masala ya kiji atö'dö a taadha ka tam'baga ma toolonadene a'da kitaalo tagoroo'bo kide, lakiini tagoroo'bo ma kadu ma 'büdhülü ya, kicci tö'dö ana inde.

¹¹ Aaga assa ka tagoroo'bo tanno ada a tussu kide tanno Masala no manangnga aaga kanaana iyye kide, ri'ba naada nja tasaasa nja tagu'daana ka eedi nja ta'diinö ka eema nye'd'de, kussu kadu kinsili aaga ka nanggeedi ka eema tiya 'do.

¹² Aminna üürü a'a narigiri ada aaga, taalo kudumma ömö'di tiya üünä ada kadu ku'bu ya nja tiya üninja ku'bu ya, lakiini amang kada tijöögö kadha ma Masala a nanggeyi tanno ada kadakardha ku'bu ma ungnö.

¹³ Aaga kungngo kanangnga ungnö ka tidhi oona ku'bu, lakiini dhodho niidi kadhabbu 'do kudumma dhodho tanno Tito kudumma korong-gore tiya iini ka ta'baga oona ku'bu ana aaga in'dili kungngo.

¹⁴ Nala a'a ta'diniga oona coo'do neede iini ana aaga taalo kanangnga a'a kaana modolo. Lakiini eema yïidi kadiraana aaga ya nye'd'de aga timin'da, yungngo ta'diniga oona niidi ana aaga co Tito, kütü ka co ööye miini dhorro.

¹⁵ Eedi yiini akogoona ma tasaasa aaga, kini kara tagiigi taföonyö eema naada in'dili nja tamma kini nja tamma kini tanno ada a ri'ba ma Masala a ta'deedene ka oona.

¹⁶ Ka'diila oona eede namma ka tumma tanno ada ma eema nye'd'de.

8

Tawaana ma gürüüsi koono

¹ A 'bitingngö nagöre eede, kasaasa ungnö a'da aaga tussu a'da minna a türü ma Masala ka tagalinggo a kadu ma nakaniisa ka Makadoniya.

² Ka dhügürü tiya eene ya dhabbu ya, ya Masala ka ta'b'ba eege iini ya, kadhodho dhodho na dhabbu no, a tassa keema neene dhindho no, tagala kanangnga eege kana eema dhabbu a tamana eema ku'bu tanno eene.

³ Ara a'a tiki aaga a'da kanangnga ku'bu dhabbu ndama nanggeedi tanno eene ka teene, adhabbu adagii'bi türü neene.

⁴ Kaga'bunu angnga kide, kasaasa a'da eege toso ka tonsoona ma eema ma tunggu co a kadu ma kaniisa.

⁵ Kagala kadagalinggo adhabbu adha, yïidi ka tagümmöönö ka nanggüüdü ya, kümmünü nanggeyi neene Uugaara ka dhidha, kassa ka tamma kidi a tasaasa ma eedi tiya Masala.

⁶ Kiki ungnö a Tito a'da atüimö linggo ma baraka nja aaga, afa miini ka ata tüm'bü miini ku'bu kungngo.

⁷ Kana aaga eema nye'd'de kungngo, tamma ka Masala nja tumma, nja ta'dara, nja tasaasa ta kinya eema a kadu nja tasaasa tanno ada nja ungnö no, ungnö tasaasa aaga afe'de a'da aaga takardha ku'bu ka linggo ma tasaasa ajeene ma türü,

⁸ taalo a'a na'buna aaga kide, lakiini a'a nasaasa tassa ka tasaasa ma kadu könö ka dhorro ma tara tussu a'da ka köje tasaasa naada nya?

⁹ Kussu aaga türü na Uugaara tiya aja Yasu Almasiini üpü eyi yiini co kudumma angnga a'da eema ungnö iini nye'd'de, amang kada tana eema a ta'döngngönyö tanno iini.

¹⁰ Tumma neede kiki, a'diila nja aaga ada kara tatüimö naada ka tata tüm'bü miini kambele no, kudumma ada aaga kungngo kasaasa ka dhidha.

¹¹ Aaga tüimö linggo 'bitingngö amang ka tasaasa tanno ada tunggeene nja tatüimö tanno kada no.

¹² Üürü aaga kasaasa tanangnga eema ku'bu, ara Masala tamma ka nüimö tiya ada kanangnga ku'bu ya, taalo ka eema tiya taalo ya.

¹³ Taalo a'a niki a'da aaga tadhügürü ara kadu öccö ka lingnge, lakiini a'a niki a'da aaga taneene kada köje.

¹⁴ Aaga tinya eema a kadu tanno eema kati-taalo kene no, amang kene tinya eema aaga kini kara titaalo kada taka öccö, amang ka eema taköje kada.

15 Sorne ma Masala iki, “Ömö'di ya awaana eema koono dhabbu ya, taalo ara türeene kini, ömö'di ya awaana eema koono idhilli ya, taalo nīimō ara titaalo kini.”

Tito agürünüdene ma co Kürünsüs

16 Nanangnga a'a ta'diila a Masala kono ka anangnga tumma ma linggo tanno ka Tito ka eedi afa meede kanaana iyye kada kungngo.

17 Taalo i'i akogoona ma tamanaga eema angnga sugi, lakiini i'i akardha ku'bu adinigöögö ma tasaasa tö'dö kada kanna ndama eedi tiya iini ungodho i'i.

18 Kagürünü ungnö örre ma angnga ya nja iini, ya kadu ma nakaniisa ka tafünügü i'i ko'do ka linggo kudumma ma İnjīlī ya.

19 Afe'de ya, kadu ma kaniisa kagesse i'i miini ka tunggeene nja ungnö ma talinggo linggo na 'diila no, nīidi ka talinggo no ma tafünügü Uugaara ko'do, ma tussu a'da ungnö kasaasa takinyi aaga,

20 kakardha ungnö ku'bu i'i'di ömö'di öccö tanangnga hetti ungnö ka eema ya a'diila ya.

21 Tumma nīidi ka tümöönö ka nanggeedi no 'do, a'da ungnö talinggo eema ya a'diila ya, taalo ka Uugaara kidha ungodho oogo, lakiini ka kadu kidha afe'de.

22 Kagürünü ungnö örre ma angnga nja eene, yīidi ka tagīiri linggo niini ungnö taluna i'i ussu ka eema dhabbu, a 'bitingnö amma kada ana eedi dhorro.

²³ A Tito ya akinyi linggo nja a'a kada kannu, a nagöre ma angnga na ungeene nja iini no, eege kadafiini ma nakaniisa, Almasihi ara tafünügünja ko'do ana eege.

²⁴ Nggeege aaga ala tasaasa naada a kadu dhorro a niimö ya anangnga angnga ka ta'diniga oona naaja coo'do ana aaga amang ka nakaniisa tijöögö.

9

¹ Taalo ama eede ka rigiri ada ka waraga aaga ma eema tiya kadu kagürüniggi iini ma tunggu co kadu tanno Masala.

² Nussu a'a linggo naada na a'a tadhodho iini kidha ma kadu ma Makadoniya, niki eene a'da nagöre ma angnga no ka Akaiya no kindinaana oona ku'bu ma kambele ma tanangnga ku'bu, a tagu'daana ka eedi naada ka anangnga eege ka tüüni nggeege.

³ Lakiini a'a nagürünü nagöre ma angnga no kada, kudumma ta'diniga oona tanno iidi ana aaga, tanggaaga ta niimö ün'dügüngngö amang kada tindinaana oona ku'bu afa ma tiya eede ka tiki aaga ya kungngo.

⁴ Nari'ba eede kara tö'dö nja kadu ma Makadoniya, öccö kaluna aaga kitaalo kindinaana oona ku'bu, a modolo tümmü angnga amang kede tafa teema a'da aaga kungngo ka anangnga unngo ka tadhodho.

⁵ Yungngo eede ka tiki a'da a'diila eede kara tiki a nagöre ma angnga a'da kadhe a'a köö'dö kada aaga tindinaana eema yaada kindinaana ku'bu dhabbu taalo ndama rüsü.

Leele dhabbu

⁶ Amang kada tagiigi a'da ömö'di ya adiniigi idhilli ya ara migile miini tidhilli, ömö'di ya adiniigi dhabbu ya ara migile miini tadhabbu.

⁷ Ömö'di ya asaasa tamana eema ku'bu amana ku'bu afa ma tiya iini ka tiraana ana eedi tiya iini ya, taalo tümmü rüümü taalo ömö'di ma ta'bunu i'i kide, a tagussu tafa tagu i'i kudumma ömö'di tiya amana eema a kadu ana eedi ka tinsili ya Masala masaasa i'i.

⁸ Masala mambaanya tagusu türü nye'd'de ka eema nye'd'de nja naganuuru aaga tana eema yaada kasaasa ya eema ya a'diila ya tagusunja aaga ka linggo tanno a'diila no in'dili.

⁹ Afa ma sorne ka tiki,
 “Asümünaana eema ku'bu na anangnga a kadu tanno eema katitaalo kene no dhabbu, ta'diila niini a tütü ta'billi.”

¹⁰ Masala mamana tööyö a taleele nja miteene ma taguri ya mo, mara tanangnga nasigeene ka'diila a migile tadhabbu ma ta'diila ma nangeedi tanno ada.

¹¹ A Masala tanangnga aaga kadüüsü ka eema nye'd'de kungngo, amang kada tamana a kadu turi amang ka kadu tamana ta'diila a Masala kudumma unngo.

¹² Tafiki'dö a linggo tanno a'diila no taalo köödhî ka tamana eema a kadu tanno Masala sugi, lakiini anangnga kadu kamana ta'diila a Masala dhabbu afe'de.

¹³ Kadu katafünügü Masala ko'do kudumma tamma tanno ada nja taföönyö tumma ma İnjîli

nja ada kamana eema tanno ada ku'bu. Aaga toosso kide nja eene nja kadu töccö afe'de.

¹⁴ Kafara ka Masala kudumma aaga ana nanggeedi tanno eene, ara co kada kudumma türü tanno Masala na dhabbu no kanangnga aaga no.

¹⁵ Angnga tanangnga ta'diila a Masala ka türü tiya oono ka amana angnga dhabbu, taalo ömö'di ma tambaanya teema kide.

10

Bölis ümmöönö ka eyi tiya iini

¹ A'a na Bölis, nasaasa aaga ana eedi ka tiicolo nja tidhi oona ku'bu na Almasiihi, a kadu könö tiki a'da, kede kara taneene nja aaga niicolo ka eedi, lakiini eede ka tanna ku'b'ba na rüsü.

² Nasaasa a'da eede kara taneene nja aaga ya, aaga tafa tanangnga a'a ka tarüsü, rüsü neede kara taneene nja kadu iini kara tiki kide a'da unngo kaneene taneene ma tuu'da.

³ Kaneene angnga a tuu'da ma tadü'd'dü, lakiini angnga taalo keema koro'bo ma eema ma tuu'da.

⁴ Eema ma koro'bo yïidi taalo ama tuu'da ma tadü'd'dü, lakiini türü na Masala kara ta'böyö tarü'böönö na kïdhö no ku'bu.

⁵ Ungngo tarüdü ta'diniga oona coo'do nja nïimö tiya akara ada diidi ma tussu tumma ma Masala anangnga tumma nye'd'de ka pabuusu, angnga tanangnga i'i kaföönyö tumma na Almasiihi.

⁶ Kada ka tümmü tamma ma Masala dhorro ya, ikiri unngo ka tapusu kadu na silli eema no a tatiimö taföonyö naada.

⁷ Kadinö aaga niimö ndama kürö miini, ömö'di ya ussu eyi yiini a'da i'i ya ömö'di tiya Almasiihi ya, fa kini ada dhorro kudumma iini ka tatiya Almasiihi ya, unngo afe'de ka tanno Almasiihi afa i'i.

⁸ Taalo modolo magu a'a salla na'diniga oona coo'do a tauugaara tanno Masala ka anangnga unngo no, ma tindinaana aaga taalo ma taga'da aaga.

⁹ Afa tafeene afa nuurugu ri'ba ada ka nanggeedi, ana kawaraga tiya.

¹⁰ Ara ömö'di könö ana kada a tiki a'da, "Waraga ya Bölis idhindhî indhî, lakiini kini ka taneene nja angnga a 'bangnga ka oona, a tamma niini taalo ka idhindhî."

¹¹ Amang kene tussu kidi karigiri ada ka waraga a'da kitaalo unngo kütü kafeene nja tiya iidi kataneene nja aaga ya kungngo.

¹² Taalo unngo kara tambaanya toso nanggeyi niidi ku'bu afa kadu na funügü nanggeyi neene no ko'do, eege kagesse nanggeyi neene ku'bu ungodho eege ka köje ana oona neene ka oona ungodho eege a'da taalo ka'dara.

¹³ Lakiini unngo taalo kara ta'diniga oona ko'do iini, lakiini tamana ma ndhiginö tanno Masala ka anangnga unngo no ndhiginö na Masala afa kaja unngo tala aaga.

¹⁴ Taalo unngo karisi ko'do a ta'diniga oona coo'do tanno iidi. Üürü unngo taalo kö'dö

kada, kudumma iidi ka tagöö'dö kada dhorro a'da İnjüüli ma Almasiihi mungngo iidi.

¹⁵ Taalo ungnö ka'diniga nanggeyi nüüdi coo'do ka linggo tanno kadu könö ka talinggo no, lakiini kasaasa ungnö tassa ka tamma naada tinggiridene ikiri ndhiginö ma linggo naaja tadhabbu ka ndhiginö.

¹⁶ Ara ungnö teema tumma ma İnjüüli no ku'b'ba ka naanya tanno ada no, taalo ungnö ta'diniga oona nüüdi coo'do ka linggo tanno ömö'di töccö ka ndhiginö ma linggo tanno iini.

¹⁷ Lakiini, “Ömö'di ya 'dinigi eyi yiini coo'do ya, fa kini a'diniga eyi yiini coo'do ana Uugaara.”

¹⁸ Taalo ömö'di ya afünügü eyi yiini ko'do, i'i yungngo adho ka fiini, illi ömö'di ya Uugaara ka tafünügü i'i ko'do ya.

11

Bölis nja kadafüni tanno korokoro no

¹ A'a nasaasa a'da aaga tidhi nanggeedi ku'bu a 'banda'baga tiya eede ya idhilli ya, lakiini aaga kümmü aaga a'a nggeege.

² A'a nagu'daana ka eedi ma aaga ka Masala kidha, kudumma eede ka tagümmünü aaga ku'bu ma ömö'di ungodho ya Almasiihi amang kede tanangnga aaga iini afa talömu minsili mo.

³ Lakiini a'a nari'ba afa ni ka taküisüni Hawa ana ünggü tammo iini, ara nanggüüdü naada taga'dadene nggeege ka fiini ma tamma ka Almasiihi.

⁴ Üürü ömö'di öccö öö'dö kada, eema tumma ma Yasu könö a'da taalo Yasu yiidü ka teema iini nja ada kara ta'duga koronggore öccö keefe taalo afeene nja tiya ada ka'duga, alla İnjiili keefe taalo mafeene nja tammo ada ka'duga mo, ara kagala ka'diila.

⁵ Niiri a'a eyi yeede a'da taalo a'a no idhilli ka kadafiini tanno iifi no.

⁶ Üürü tumma ka kii'bi a'a ya, taalo tussu eema kara tii'bi a'a, lakiini kussu adene ungngo ka eema nye'd'de.

⁷ Alla a'a natoroko kudumma eede ka öö'dö a tumma ma Masala aaga a'da taalo faana kide, nüpü eyi yeede co, ara aaga kico aadha?

⁸ Namma a'a ma ta'duga gürüüsü ka nakaniisa könö amang kede tamünügü aaga ko'do iini.

⁹ Kede ka taganeene nja aaga a'da taalo niimö kede, lakiini taalo nakan'dana ka ömö'di a'da anangnga niimö a'a, nagöre ma angnga na ö'dö ndama Makadoniya no kamana eema a'a nye'd'de, yungngo eede ka takardha ku'bu a'da nafa tanyamanya aaga ka oona ma eema i'ndili, yungngo eede ka tümümü eyi yeede dhorro.

¹⁰ Ka tumma tanno Almasihi ka tanna kede timin'da ya, taalo ömö'di ka naanya ma Akaiya tafaga a'a keere ka a'diniga oona tanno eede coo'do.

¹¹ Aminna? Kudumma a'a taalo nasaasa aaga? Masala mussu tumma eede ka asaasa aaga.

¹² Lakiini yeede ka talinggo 'bitingngö ya, ara a'a tütü ka tüünü eema yeede ka tüünü, amang kede taadha kadu na kiki a'da eege ka'diniga oona coo'do, kalinggo afa mungngo kungngo.

13 Eege ka kadafiini tanno korokoro no, kalinggo ma tiisini kadu kümmü nanggeyi kada kadafiini tanno Almasihi.

14 Taalo aaga kama tadhère, kudumma Ebliisi kara tatem'bele oona niini afeene nja tadhangga ma töyeene.

15 Taalo tadhère eege kunggo, üürü kadu ma linggo niini küünü ünggü a'da eege ka kadu ma linggo tanno a'diila no. Keere kunggo Masala mara tapusu eege ka tatoroko ma linggo tanno eene no.

Bölis eema tumma ma dhügürü tanno iini

16 Ara a'a teema afe'de, taalo ömö'di öccö tiki kide a'da a'a na'baga, lakiini aaga amma kede salla ka taa'baga amang kede taduna niimö yeede ka ta'diniga oona coo'do iini.

17 Tumma neede ka teema no taalo tumma na Uugaara eege kamiini, lakiini a'a na'diniga oona coo'do afa 'baga.

18 Tumma ma kadu ma 'büdhülü ka'diniga oona coo'do, ara a'a ta'diniga tekere.

19 Aaga na 'dara no, aaga ambaanya kadu na nagaaga no a dhodho!

20 Aaga ambaanya taneene ma kadu tanno ümmü aaga kada kasaga no, kanyooro aaga, kagu eema yaada, kamidhi aaga, kabbü aaga ka dhugudha.

21 Magu modolo a'a meede kara tiki a'da unngo kagi'di ka oona ma linggo tanno. Üürü ömö'di öccö asaasa tabbü 'daniisö ma iini ya, neema a'a afa 'baga, ara a'a takardha ku'bu nabbü 'daniisö.

22 Üürü eege ka Ebraniin, a'a ka eyi yeede a'a na taga Ibrani taga Israyil, üürü ka kadaada tiya Abrahiim ya, a'a na 'bii'bala tiya Abrahiim afe'de.

23 Üürü eege ka kadu ma linggo tanno Almasi-ihl ya, ara a'a tiki afa ömö'di ya 'baga nagii'bi eege, nakambaanya a'a ta'b'badene nadagii'bi eege, nakete ka inde turi kungngo, naganna a'a ka pabuusu dhabbu nadagii'bi eege, nadakidhi oona ku'bu ka tabbü adene nadagii'bi eege.

24 Kabbü Yahüüdü a'a tiidümmü, a tiiso kukumu ömö'di kaco iisine kafünü iidümmü afünü egiisö.

25 Nabbü adene a maguufi tiidoona, katiidiri a'a a niigisi ta ungodho, a babüürü ta'bu ana a'a tiidoona, niyyü ka söödö ma to uuru ana ooso miini.

26 Ka tino tanno eede na dhabbu no, agalinggo 'biidi a'a ka naato, a kanyooro tagalinggo a'a, a Yahüüdü tagalinggo a'a nja tanno taalo ka Yahüüdü no, a kadu tagalinggo a'a ka naanya nja dhüle nja nagöre ma angnga no korokoro no.

27 Nadhügürü a'a nüünl mananggöoyö nja tadinigöögö turi, nja iire a tenege, nümmü tenege turi, natambaanya olle nja taneene ana oona ku'bu.

28 Eema könö inggide afe'de, dhügürü meede ka tinigöögö ma nakaniisa nye'd'de kungngo.

29 Ömö'di ka tagi'di na a'a tagi'di tekere? Ömö'di tara tüünl tam'baga a 'bangnga miini taalo tagu a'a?

30 Üürü dhodho ma ta'diniga oona coo'do ka inggide, ara a'a ta'diniga oona neede coo'do a

tagi'di tanno eede.

³¹ Masala nja Pupa tiya Uugaara Yasu mara tafünügünja ko'do ta'billi mo, mussu a'da taalo a'a nakorokoro.

³² Uugaara tiya linggo ada uugaara ya dhabbu ya ana eere a'da Alharis ya ma Demasak ya, anangnga kadu ka teere ka naginyeene ma anyameene kara tümme a'a.

³³ Lakiini nagöre ma angnga kanangnga a'a ka singgili kimi'dina aru kide kadhiki a'a caa'bu ndama ööye ma ar'da, noolonadene kini ka iisine.

12

Bölis iji eema ya tö'dö ya

¹ Ara a'a ta'diniga oona coo'do nadhodho. A'da nussu a'a taalo taduna niimö kide ara a'a tunggeene a tumma na ö'dönja no tanno Uugaara noono kala a'a kide no.

² Nussu a'a ömö'di ya Almasihi inggide aga'dugadene aco 'dotombo'do tanno iidoona. A nagürüünü miini ka ndö'dö kada'baaga kafünü ka egüisö, taalo a'a nussu ömö'di ka tuu'da alla kürö ma tuu'da tanno iini, Masala oogo mussu.

³ Yeede ka tussu ya, ömö'di a'dugadene aco 'dotombo'do a tuu'da tanno iini alla ana oona ku'bu, taalo a'a nussu Masala oogo mussu.

⁴ Nussu a'a a'da a'dugadene aco 'di ma singgi nataföonyö tumma kide taalo tadü'd'dü ara tussu ka teema, itaalo ama iini ka tadünnü.

5 Ömö'di ya miini ya ara a'a ta'diniga oona coo'do miini, lakiini a'a taalo nara ta'diniga oona coo'do illi a tagi'di tanno eede.

6 Üürü a'a nasaasa ta'diniga oona coo'do ya, taalo a'a na taa'baga, kudumma eede ka tema tumma ma timin'da. Lakiini taalo a'a na ta'diniga oona coo'do iidi ömö'di öccö tema tumma ma a'a nja iini ka tiji aföönyö kede.

7 Amang kede tafa ta'diniga oona coo'do ma tindhhi ma tiya alanja a'a kakanangnga timmi kede ka tuu'da kada tafiini tiya Ebliisi ma tabbü a'a.

8 Nafara a'a ka Uugaara tiidoona a'da ma'duga kede ka oona.

9 İkirı ka tiki a'a, "Türü neede ka 'dimo küdü, kudumma türü tanno eede kussu adene ka tagi'di." Nikiri a'a ka tadhodho na'diniga oona coo'do a tagi'di tanno eede no amang ka türü tanno Almasihi taküdhü a'a ka oona.

10 Nggeege ya yungngo eede ka tadhodho ka tagi'di tanno eede nja teeladene nja midhi, a mananggöyö nja dhügürü ka üüdü ma Almasi- ihi, kudumma eede kara tagi'di nana türü.

Bölis adinigöögö ma kadu ma Kürünsüs

11 A'a nungngo nanda'baga, aaga kungngo kaga'bunu a'a kide. Aaga kama tafünügü a'a ko'do, üürü taalo a'a na niimö ya, lakiini taalo a'a nadhilli ka "kadafiini tanno iifi no."

12 Natakalaala eema aaga nidhi oona ku'bu kada ka söödö amang kada tussu a'da a'a tafiini, eema keefe a türü ma tale'bele eema.

13 Niimö öccö yungngo ada ka titaalo kafeene nja türeene ma nakaniisa iini, illi tumma eede

ka titaalo nanyamanya aaga ka oona a'da aaga tanangnga faana ma linggo tanno eede a'a. Aminna aaga fa kede ka eema tiya eede ka tagüüni ana aaga ya!

¹⁴ A'a nungngo nakindinaana oona ku'bu ma tara tö'dö kada kannna asa tiidoona taalo a'a nara tanyamanya aaga ka oona lakiini nasaasa a'a aaga taalo almaala yaada, taalo laala indinaana eema ka kafaafa meene ku'bu, lakiini kafaafa eege kungngo kindinaana kene ku'bu.

¹⁵ Ara oona ta'diila eede kede kara taama eema yeede naama eyi yeede afe'de. Üürü a'a nasaasa aaga dhabbu 'dee ara aaga tasaasa a'a idhilli?

¹⁶ Afiigi nggeege taalo a'a nanyamanya aaga ka oona ma nïimö. Lakiini könö kiki a'da a'a nakorokoro.

¹⁷ Na'duga a'a nïimö kada ndama kadu tanno eede ka agürünü eege kada no?

¹⁸ Naga'bunu a'a Tito ka öö'dö kada nagürünü örre ma angnga nja iini, aga'duga Tito nïimö kada? Taalo unngngo kagalinggo a Koronggore tiya unnggodho ya, taalo unngngo kuurna fiini ya miini ya keere?

¹⁹ Kiki aaga kide a'da tamma nïidi no a'da unngngo ka ümmöönö ka eyi tiya iidi kada kidha? Keema unngngo ka Masala kidha ana Almasihi, tumma no in'dili nagöre eede ma tindinaana aaga ku'bu.

²⁰ Nari'ba a'a eede kara tö'dö kada kannna ara a'a taluna ka fiini tiya ada kitaalo kasaasa a'a iini ya, aaga taduna a'a ka nïimö yaada taalo kasaasa ya, nja eede ka taluna tagoroo'bo kada ka söödö, nja kirimi nja midhi nja tisaana ka

oona nja tanu aana ka oona nja tadhe kadu nja tabbü na'dugiisine nja taga'da 'buugu.

²¹ Eede kara tö'dö afe'de ara Masala meede teela a'a nafara ma kadu kadhabbu na agüüni tam'baga ka dhidha no, kitaalo kaadha kide no, temelö nja füngngö nja kadu kadhoonyo nja tatoroko.

13

Tumma na eere no

¹ Tö'dö kada kada kanna neede kanda iidoona. Sorne iki a'da, "Nüümö ya ara teemadene ma kadu keera nja eene ka tiidoona kadinö kide."

² Tö'dö kada kanna neede teera no, naganangnga a'a tumma a kadu tanno üüni tatoroko no, a'a nungngo nadirina afe'de a'da nitaalo a'a. Kede kara tafada taalo nara tana 'bangnga ma kadu tanno agüüni tatoroko kadhabbu no, alla kadu öccö.

³ Kudumma ada kasaasa tussu a'da Almasiihi eema ana onngo'do tammo eede, Almasiihi taalo agi'di ka oona ma talinggo nja aaga, lakiini i'i ana türü kada ka söödö.

⁴ A'da i'i abünnünja ka salii'bi a tagi'di tanno iini, illi i'i 'bitingngö efe ka 'di a türü tanno Masala. Ungngo afe'de kagi'di kini, lakiini a türü ma Masala ara unnggo tefe ka 'di ana i'i ma talinggo ada aaga.

⁵ Aaga iiri nanggeyi naada ta'diila, kümmü aaga tumma ma Masala dhorro aaga iiri eyi yaada alla taalo aaga kussu nanggeyi naada a'da

Yasu Almasiihi ungnngo ada ka oona? Illi kada ka tagi'digi ko'do ka ta'b'badene.

⁶ Kasaasa ungnngo a'da aaga tussu a'da taalo ungnngo kagi'di.

⁷ Kafara ungnngo ka Masala a'da aaga tafa talingngo eema ya toroko ya, taalo a'da ungnngo kii'baana, lakiini amang kada tüüni eema ya a'diila ya salla ungnngo a kadu saga tümümü ungnngo kagi'digi ko'do.

⁸ Taalo ungnngo kara tambaanya tüüni niimö ma tadiidi timin'da, lakiini kalingngo ada ungnngo a timin'da.

⁹ Kudumma iidä ka tadhodho kidi kara tagi'di, aaga tana türü, niimö yiidä ka afara ka Masala kide ya a'da aaga tadho ka fiini aaga tinsili.

¹⁰ Narigiri ada aaga a'da nitaalo a'a kada kete amang kede tafa tüüni tatoroko ana aaga a'da a'a nungngo ata kete afa ma türü tanno Uugaara ka anangnga a'a no ma tindinaana aaga ku'bu taalo ma taga'da ada aaga ku'bu.

Tööjülü na eere no

¹¹ Keere kungngo nagöre eede, aaga adhodho, nunggeene a'a ka fiini ma ta'diila, aaga toodo kede nasaasa a'a a'da aaga timi'di tumma ka ungnodho aaga taneene a ta'diila, a Masala ma tasaasa nja ta'diila, mara taneene nja aaga.

¹² Aaga tööjülü tööjülü na insili no.

¹³ Kadu ma kaniisa kööjülü aaga nye'd'de kungngo.

¹⁴ Fa ka türü tanno Uugaara Yasu Almasiihi nja tasaasa ma Masala nja tagureene ma Koronggore tiya Insili aneene nja aaga nye'd'de kungngo.

Katcha

Katcha-Kadugli-Miri: Katcha (Old Testament)

copyright © 2020 Wycliffe Bible Translators, Inc.

Language: (Katcha-Kadugli-Miri)

Contributor: ECS Diocese of Khartoum Translation Department

All rights reserved.

2020-11-18

PDF generated using Haiola and XeLaTeX on 18 Apr 2025 from source files dated 29 Jan 2022

bc98a4a0-1c85-5c7a-932a-7dcefd213f80